

58.  
56.  
723.

987

AB  
154084





- oo ll  
 1. Bugenhagen s. Joh. / Schrift  
 von der jüdischen Königs-  
 wüßung, Wittenberg, 1546
- oo ll  
 2. Hoefler s. Michel / ar. b. mann  
 s. in d. is. g. f. f. l. l. l. l.  
 z. d. t. s. l. l. l. l. l. l. 1546.
3. Dietrich s. Veit / b. w. s. t. an  
 in. n. n. n. n. n. n. 1558.
4. Summerhart s. Heinrich / frays  
 von einem jüngling an einem  
 Carthusier. Colmar, 1524.

5. Nekum / Friedel / smannung  
an alle fromme, des Göttliche  
werffs in Amberg,  
Zwickau, 1529.
6. Zum Drübel / Eckhart /  
smannung an die Christenheit,  
Strasburg.
7. Wor die ganze welt am  
gemaest;
8. Herrmann / Nicol / mandat  
jeru an alle Christen.  
1529.
9. fritzhan / sich / wie man  
gottes werff von dem welt.  
1529.
10. Marschallk / Hans / schreibe  
an Georg v. Prosperey  
Zwickau, 1529.
11. Plage Jeru über die Evangelischen  
Schleiergen 1556.
12. von Bart / Jar / Christliche  
Gedanken, Dantzig, 1569.



13. Christliche Unterweisung  
des unseligen und frommen  
anvertrauten Gottes,

14. vom Lobe Gottes, Zwickau,  
1523.

X

2

Wes man sich in disen ge  
fährlichen zeiten halten/ vnd wie man  
dem zorn Gottes/ so vber die Welt  
entzündet ist/ zuuorkomen soll/  
Auch was die ursach solches  
zorns sey. Durch

Michael Höfer/ Diener am  
heyligen Euangelio zu Wert  
heym/ gestellet.

Deut. am 32  
O das sie weyse wern/ vnd vernemen  
solches/ das sie verstünden / was  
inen begegnen wirt ic.

M. D. XLVI.

Faint, illegible text, possibly bleed-through from the reverse side of the page. The text is arranged in several lines and appears to be a list or index of some kind. Some words are difficult to discern but may include names or titles.

M.D.XLVI





Je wunderbarlich Gott der All-  
mechtig die Kinder von Israhel etwa  
geföhret vñnd beschützet/ist niemandt  
verborzen/dann er hat jnen geben vñ  
fürgesetzt/Mosen/Josnam/vñnd vil  
frommer helden mehr/welche sie von  
iren feinden erlöset vñd errettet haben. Aber so wol  
hat ers mit jhnen nie gemacht/das sie ganz quit vñd  
ledig gewesen sind/sonder haben für vñd für müssen  
hend im har haben/damit sie nicht sicher wurden/vñ  
Gottes ires herrn vergassen/Dañ so pflegts zu geen/  
weñ man rühwíg ist/vñd kein widerwertigkeit hat/  
wirt man faul vñd fahlessig/vergíft des Herrn/auf  
welchem dañ alles vnglück volget/Ziber wie hart sie  
auch betrangt gewesen sind/so hat sie doch Gott ge-  
waltiglich erhalten. Also auch im newen Testament/  
hat der Herr sein kirchen vñd volck für vñd für/vor  
dem grím der feinde wunderbarlichen beschirmet/vñ  
ob er schon den feinden zu wúitten ein zeitlang zu ge-  
lassen hat/so haben sie doch anderst nichts daran ge-  
wunnen/dann (wie offenbar) jhr entlich verderben.  
Des gleichen wírdt er noch heut bey tag/ ja bis ans  
endt der welt thun werden/dannes ist beschlossen/  
Das die pforten der hellen nichts wider Christum vñ  
seine heilige kirch vermögen soll. So wirt auch der/ *Mat. 16.*  
der zu Christo sprach/ Setze dich zu meiner rechten/  
Christum vñd seine heilige kirch/so er durch sein ster- *Psal. 110.*  
A ij ben

ben vnd blut erlöset hat/wol erhalten werden/dann  
Deut. 32. er ist trew vnnnd warhafftig/hat niemandt gelogen  
noch betrogen/er wirts vns auch nicht thun/Allein  
wir sehen zu/vertrawen vnd glauben jm/rüssen ihn  
herzlich an/lassen in die sach handlen/Vnd thun wir  
Psalm. 50. das vnser/wie er spricht/Küss mich an in der not/so  
wil ich dich erretten/so soltu mich preysen/Dann wo  
Psalm. 127. der Herr das hauf nicht bawen wirt/vnd die Stadt  
bewaren/so bawen vnnnd wachen alle menschen ver-  
gebens. Derhalbē sollen wir in diser gefehrlichen zeit/  
da meniglich schreit/man werd vnser ware Religion/  
das heilig Euangelion außrotten/an Got dem herrn  
in keinem weg zweyffeln/das er seinen namen vnnnd  
wort werd vndertrucken lassen/wie der Endechrist/  
die Babylonisch hur/ das kindt aller verdammus zu  
Rom mit seinem Teuffelischem hauffen vn̄ gliedmaß  
schon beschlossen/vn̄ für hat/Sonder sollen vil mer fe-  
stiglich glauben vnnnd trawen/ Gott werd dasselbig  
sein wort ewiglich erhalten/ja ehe ein titel vn̄ p̄inct-  
lein solte dauon auffhören/ehe müsten zergehen himel  
vnd erden/vnnnd alles was Gott ye beschaffen hat/  
Dan es heist/wie der Psalm sagt/ Der Herr hat ein  
Psalm. 93. reich angefangen so weit die welt ist / vnd zugericht/  
das es bleyben soll/vnnnd wirdts weder Papst/welt  
noch Teuffel außrotten werden / dann der es ange-  
fangen vnd zugreicht hat/wirts auch wol erhalten/  
Vn̄ spricht ferner im Psalm/ Von dem an/stehet dein  
stuel



stuel feste/ du bist ewig/die wasserwegen im Mere  
seind zwar groß/vnd prausen greulich/der Herr aber  
ist noch grösser inn der höhe. Zu dem so ist sein wort  
nicht ein falsch/ erdicht / vnnnd erlogen wort/als des  
Bapsts/sonder ein rechte lehr/die den Menschen er=  
quickt vnd seligmacht/wie Paulus zum Römern am  
1. sagt. So hat auch der Herr geschworen/vnd  
wirt in nicht gerewen/das Christus ein Priester soll  
sein ewiglich/nach der weise Melchisedeck. Was könt  
oder möcht nu gewissers gesagt sein/Er hat geschwo=  
ren/es wirt in nit gerewen/vnd dasselb in ewigkeit.  
Er ist nit/wie die menschen/so lügner/zeitlich/törecht  
vñ onmechtig seind/welche schweren vñ verheissen/  
vnd nit leisten noch halten können / vnd ob sie schon  
zun zeiten etwas vermögen/das doch selzam ist/so  
weret es dennoch nicht ewiglich/dann sie seind faren  
de hab/vnd wie man sagt / Consilium cito mutatur.  
Wo sie vermeinen jr fürnemen hinauf zu bringen/da  
verschwinden sie wie spreuer vorm winde/Gott a=  
ber ist ein warhafftiger/ewiger/weyser vnd starcker  
Gott/der alles das/so er verheissen hat /trew vnnnd  
stet halten wil/Wie Samuel sein volck tröstet/da er  
spricht/Der Herre wirt euch nit verlassen die jr sein  
volck seit/vmb seines grossen namens willen / dann  
er hat geschworen / er wöll euch ihm zu ein volck  
machen.

Psal. 110.

Psal. 1.

1. Reg. 17.

¶ iij Solche

Solche vnd dergleychen sprüch / solt man yetzt  
mit ein busfertigem leben täglich treyben / Den wir  
sehen / das Gottes zorn vber vns ist hefftig entzün-  
det / dermassen / das / wo wir ime nit zuuorkommen /  
Mat. 21 zubeforgen ist / das reych Gottes werde von vns ge-  
nommen / vnd ein andern volck gegeben. Wie vil jar  
nun hat vns Gott sein heyliges Euangelion rein vñ  
lauter verkündigen lassen / aber gar wenig das selb er-  
kant vnd angenomen? Was grosse gnad vnd gut-  
that / hat er vns vber das alles vor andern reichlichen  
erzeygt / vnd wenig habens erkent / vnd ime dafür ge-  
dandt? Ist es nit ein grosse schandt bey der Welt /  
die vndandtparckeyt / da es etwann kaum zwen oder  
drey pfenning antrifft? Solt es vor Gott nit auch  
ein schandt / ja aller peen vnd straff wirdig sein / da es  
nit allein zeytlich hab vnd güter / sonder ewige güter /  
das ewig leben antrifft? Zwar wir sehen zu / es ist  
die Art dem baum schon an die wurzel gelegt / wirdt  
Mat. 3. er nit frucht tragen / so wirt ihn der Herre abhawen /  
vnd mit feur verbrennen.

Wie sol man aber dem zorn Gottes zuuorkom-  
men? Solchs soll vns der Prophet Joel lehren / der  
Joel. 2 spricht / Blaset mit Posaunen zu Zion / heyliget ein fa-  
sten / ruffet der gemein zusammen / versamlet das volck  
heyliget die gemein / samlet die Eltesten / bringt zu hauf  
die jungen Kinder / vñnd die seuglinge / Der Breutigam  
gehe auß seiner kammer / vnd die Braut auß irem  
gemach

gemach/Last; die Priester des Herrn diener/weinen  
zwischen der hall vnnnd Altar/ vnd sagen/ Herr/ ver-  
schon deines volcks/vnd laß dein erbteyl nit zuschan-  
den werden/das Heyden vber sie herrschen. Beferet  
euch zum Herrn/spricht er/von ganzem hertzen/mit  
fasten/mit weinen/mit klagen / zerreysset ewere her-  
zen/vnd nit ewre kleyder/so wirt sich der Herr auch  
zu euch keren / denn er ist ja gnedig / barmhertzig/ ge-  
dultig/vnd von grosser güte/ vnd rewet in bald der  
straffe.

Wie nun hie der Prophet lehret/also sollen wir  
thun/so wirt sich Gott vber vns auch erbarmen/vñ  
die fürgenommen straff/von wegen vnser schweren  
sünd/gnediglich abwenden. Denn auff dise weyse  
handelt er mit denen zu Ninive/er het im fürgenom-  
men die Stat auff den boden zuuerderben / Da sie  
aber die predigt des Propheten Jone auffnahmen/vñ  
folgten seiner lehr/fasteten/beyde vihe vñ leut / jung  
vnd alt/vnd stunden ab von irem bösen weg/vnnnd  
fürnemen/ Da endert Gott sein rath vnd fürnemen Jon. 3  
auch/strafft sie nit/sonder war inen gnedig.

Das aber niemand vermaine/fasten/beten/heu-  
len/weinen vnnnd klagen/mög Gott die fürgenommen  
straff abbitten / soll man eygentlich wol wissen/ das  
weder fasten noch betten/heulen noch weinen solchs  
vermögen/Sonder das zerbrochen hertz vnd gewis-  
sen/dauon David sagt / welche sich mit disen seinen  
früchten

früchten an tag gibt/vnnd erzeygt/ als der Prophet  
Joel sagt/ Zerreyß ewre hertzen/ vnnd nit ewre kley-  
der/ Als wolt er sagen / wo das hertz nicht erschrickt  
vor Gott/ von wegen der sünden/ vnd zugleych mit  
disen eusserlichen geberden vn̄ werck̄en sich erzeygt/  
das im ernst sey/ seiner gethaner sünden/ vnd missen-  
that/ vnd förter recht zuthun begert/ so wirdt fasten  
vnd beten/ heulen/ weinen vnd klagen/ seck̄ anziehen/  
vnd trawig sein/ wenig helffen. Denn also sagt Jo-  
nas/ Got sahe an ire werck̄/ das sie sich bekereten von  
irem bösen weg / rewet ihn des übels/ das er inen ge-  
redt het zuthun/ vnnd thets nit/ Es stehet nit allein/  
Gott sahe an ire werck̄ zc. Sonder/ es stehet dabey/  
Gott sahe an/ das sie sich bekereten von ihrem bösen  
weg. Was ist das anderst/ dann sie theten die rechten  
guten werck̄/ so Gott gefellich waren/ als Got förch-  
ten/ an in glauben/ in lieben/ bekennen/ predigen/ in an-  
ruffen/ in danck̄ē/ sein lehr̄ fördern. Item/ fleyssig sein  
inn aller regierung vnd diensten/ zu Gottes lob.  
Solches vnnd dergleychen/ dieweyle es auß glauben  
geschach / so war es dem Herren angenehm/ laut des  
spruchs Pauli/ Alles was nicht auß glauben geschicht  
ist sünde/ Dann so lieb ist Gott der glaub/ das im al-  
les soll angenehm sein/ was auß solchem entspringt.

Ro. 14.

Hieraus sehen wir nun/ wie wir fasten/ beten/  
heulen vnnd weinen sollen/ nemlich / auß glauben/ so  
wirt vns der Herr gnedig sein / vnd sein fürgenom-  
men

men straff gnedig abwenden/sollen auch gedencen/  
es sey allein genug am eusserlichen gethonem werck/  
dan solt Got allein dasselb ansehen/wirt Christus nit  
gesagt haben / Lieb Gott von gantzem hertzen/von  
ganzer seel/auf allen deinen kressen/er wirts wol  
bey der eusserlichen Phariseischen lieb haben lassen  
bleiben/aber / er wil das hertz haben/vnd was daher  
fleust/ist ihm alles(es sey auch bey der welt wie ner-  
risch es immer wolle ) angeneh/Item/er wirt nicht  
vergebens gesagt haben / Dises volck nehet sich zu  
mir mit seinen leffzen/aber jr hertz ist ferne von mir.  
Wollen wir nun Gottes zorn zuuor kommen/so last  
vns dasselbig thun/mit fasten/beten/ weinen vn klä-  
gen/Aber nicht wie die stift vnd klöster/die kirchen  
vol plerren/vil fasten(wiewol sie in disem stück nicht  
strefflich seind/dann sie seind ye tag vnd nacht vol/  
das ist yetzt jr fasten) vil betē/eusserlich ein schön schei-  
nets leben füren/vnd ihnen gar wenig zu hertzen ist/  
vnd vermeinen doch/Gott mus das gethone werck  
ansehen/Sonder wie der Prophet von vns fordert/  
da er spricht/Zerreist ewre hertzen/vnd nicht ewere  
kleider.

Was heist aber die hertzen zerreißen? Inn der <sup>Die hertzen</sup>  
geschrifft heist das die hertzen zerreißen/ Wenn der <sup>zerreißen.</sup>  
mensch vor Gottes zorn vnd vrtail/ von wegen sei-  
ner grossen sünde/also erschrickt / das er vermeint/  
Gott vnd die ganze welt sey im zuwider/also das er  
B bey

bey keinem menschen/noch Engel, ja bey keiner Crea-  
atur/mög hilff erlangen/vñ mit David spricht/Herr/  
wo sol ich hingehen vor deinem Geist/kom̄ ich inn hi-  
mel so/bistu da/kom̄ ich auf erden/so bistu da/kom̄ ich  
inn die helle/so bistu auch da/neime ich flügel der mor-  
Psal. 139. genröte/vñnd flüge bis ans ende der welt/so kan ich  
dir nicht entgehen. Herr dein hand ist tag vnd nacht  
Psal. 32 schwer auff mir/das mein safft vertrockent/wie es  
im Som̄er dürr ist/Item deine pfeil stecken inn mir/  
vnd dein hand druck̄et mich/es ist nichts gesundes an  
meinem leibe für deinem dreyen/Vnd ist k̄ ein frid in  
Psal. 38. meinen gebeinen für meinen sünden. Wo nun solches  
geschicht/so heist es die hertzen recht zerreißen. Das  
aber niemandt von wegen seiner sünd verzweyffel/  
spricht der Prophet nicht/Weichet vom Herren/er  
wil euch nit annemen/noch sich vber euch erbarmen/  
sonder bekeret euch zum Herrē ewerm Got/dañ er ist  
ja barmhertzig/vnd rewet in bald der straffe/Vnd es  
sey dann/das der mensch jme Gottes huld vñ barm-  
hertzigkeit/durch Christus verdienst also theilhaftig  
mache/vnd durch den glauben an Jesum Christum/  
sich widerumb/von sein fall vnd irrthumb auffrich-  
te/so hilfft in sein rewig vnd zerbrochen hertz nichts.  
Denn sihe Judam/welcher auch ein zerbrochen hertz  
hett/Dieweil er sich aber der gnaden Gottes durch  
Christum nicht theilhaftig machte/seine sünde gröf-  
ser vnd höher achte/dañ Gottes hulde/sanck̄e in ver-  
zweyffel

zweyffelung / halff ihn nichts / wie ewig auch sein  
hertz war.

Derhalben last vns nit allein vnser hertzen zer-  
reissen / das ist / vnser sünd hertzlichen erkennen / rew  
vnd leyd darüber tragen / sonder last vns auch mit  
dem armen sündler an die brust schlagen / vñ sprechen / Luc. 18  
mit vngeweifeltem glauben / Sey vns Gott armen  
sündern gnedig. Ja last vns mit dem verlornen Son  
widerumb zum vater keren / vnd sprechen / Vater / wir Luc. 15.  
haben gesündigt vor dir / vnd im himel. Dir alle ehr /  
du bist gerecht / wir aber müssen vns schemen / Du Dani. 9.  
grosser vnd schrocklicher Gott / du hast bund vnd  
gnad / denen die dich lieben / vnd deine gebot halten.  
Darumb spricht er / So war ich leb / so wil ich nit des Ezech. 33.  
sünders tod / sonder sein leben vnd seligkeit. So hör  
ich wol (möchstu sagen) wenn ich allein rew vñ leyd  
vber mein sünd trage / vnd hernach an Gottes barm-  
herzigkeit nicht zweifel / so bin ich schon genesen / darff  
derhalben weder fasten / beten / heulen / weinen oder  
klagen / Warumb spricht dan der Prophet / Heiligt ein  
fasten / weinet / heulet vnd klaget / Thuts dan fasten /  
weinen / heulen vnd klagen / was sol der glaub : Oder  
thuts der glaub allein / was soll dann fasten / weinen /  
vnd klagen : Das ich hab droben auß dem heyligen  
Paulo gesagt / Was on glauben geschicht / ist sünd / ja  
wie die Epistel zum Heb. spricht / On glauben ist vn- Heb. 11.

B ij möglich

müglich Gott gefallen/muß man wol mercken/Die  
geschrifft redet nicht dermassen vom glauben vñnd  
wercken/wie die vnuerstendigen halten / das/wo  
glaub helffe/da helfen die werck nichts/ vñnd wider-  
umb/wo die werck sollen helfen/ als ein vnuersten-  
diger auß der geschrifft oft verstehet/da helffe dann  
der glaub nichts. Die geschrifft redet vom glauben  
der ein warhafftiger thetiger glaub ist/vñ sich durch  
gute werck/als ein guter baum /durch gute fruchte/  
herfür thut/vñnd sehen leß/vñnd wo er on frucht ist/  
so ist kein glaub/sonder allein des glaubens laruen.  
Vñnd widerumb gute werck/seind nicht gute werck/  
wenn sie on glauben geschehen/sonder laruen der gu-  
ten werck. Darumb sollen wir nicht gedenden/es  
sey genug wenn wir vnser sünd erkennen/vñnd Gott  
glauben/wie wir meinē/ das es on werck ein rechter  
glaub'sey/sonder müssen auch dises glaubens frucht/  
soll er anderst recht sein/erzeigen/ vñnd an tag geben/  
durch welche er vor Gott / vor den Engeln / vor  
den menschen auff erden / ja vor dem Sathan vñnd  
allen Creaturn gesehen vñnd gespürt soll werden.  
Dann so wenig feur on hitz/wasser on feuchtigkeit/  
Vater on Son / oder Son on Vater sein mag/so  
wenig mag ein rechter glaub/on gute frucht/vñnd  
widerumb rechte gute werck vñnd frucht/on rechten  
glauben sein.

Derhalben



Derhalben sollen wir yetzt zu diser gefährlicher  
zeyt/ da sich der groß vnd teuffelisch Goliath/ wider  
den armen vnd kleinen David auff lehnet/ ja nicht al  
lein zu diser/sonder zu aller zeyt/ vnsern glauben mit  
guten wercken beweysen / das vns Gott sein wort  
werde nicht entziehen/ werde nicht ansehen vnser sün  
de/sonder sein lieben Son Ihesum Christum/ der der  
recht mitler vnd heyland zwischen Got vñ menschen  
ist/ vñnd werd vns sein gnad vñnd barmhertzigkeyt  
mitteylen/ welcher mer ist/ dann sand am Meer/ vnd  
Stern am hymel. Psalm. 36. Dann es spricht ye David/ Herr  
deine güte reicht so weyt der himel ist/ vñ deine war  
heyt so weyt die wolden gehen. So last vns nun  
ansehen die grosse vnd hohe not Teutscher Nation/  
fürnemlich vnserer Kirchen / Last vns dem Herren  
entgegen gehen mit ein busfertigem wandel vnd le  
ben/ Last vns fasten/ vnd vnser leyb fasteyen/ damit  
wir dester geschickter zum gebet / vñnd allen gutten  
wercken sein mögen / Last vns vnser glider / wie  
Paulus sagt/ töd: en/ hurerey/ vnreynigkeyt/ lüste/ bö  
se begirde/ vnkeuscheyt/ vnd den geytz (welchs ist Ab  
götterey) vmb welcher willen kompt der zorn Got  
tes vber die welt/ ablegen. Vnd fürnemlich last vns  
das grausam vñ erschrocklich schweren vnd Gotsle  
stern/ sampt dem eigen nutz (welcher die welt vol ist)  
auf vns ganz vñ gar außrotten/ Wer geflucht hat/  
fluch nit mer/ hebe dem Herrn sein marter vñ leyden  
B iij nicht

nicht so vergeblich auff/denn er wirdt den nit vnge-  
Ephē. 4 strafft lassen/der seinen namen vergeblich füret. Wer  
gestolen hat/stele nit mer/sonder arbeyt mit den hē-  
den etwas redlichs/da von er dem dürfftigen helffe.  
Psal. 4 Wer gezürnet hat / der sündige nicht / laß die Sonn  
vber seinem zorn nicht vntergehen/lieb/helff vñ rath  
seinem nechsten/wie er wolte/das jm geschehe. Sum-  
1. Cor. 15 ma/Er fege den alten saurteyg auß/vnnd werde ein  
Joh. 3 newer/Dann welcher nicht ein newer mensch wirt/  
Col. 3 mag nicht selig werden. Vor allen dingen laß vns  
halten dasband der volkommenheyt/welchs ist / die  
lieb/so wirt der frid Gottes inn vnsern hertzen wo-  
nen/dann dazu sind wir beruffen.

Werden wir aber in vnserm gottlosen vnd vn-  
busfertigen leben fortfaren / beharren inn aller vn-  
zucht/als leyder die welt thut/vnd jr nichts mehr zu  
vil ist /ja auch die / so solchs zu wehren vnnd straffen  
haben/fahlessig vnd faul sein werden/ so wirt Gott  
mit seiner fürgenommen straff jm̄er fort faren / vnd  
nicht nachlassen/bis er vns ganz vnd gar hat aufge-  
rottet/Dañ er ist ein schröcklicher vnd zorniger Gott  
den bösen/ja so schröcklich/ das die erd vor ihm bebet/  
Psal. 18 vnd sich beweget. Die grundfeste der Berge sich re-  
get vnd bebet/wenn er zornig ist/Dampff gehet auff  
von seiner nasen/vnnd verzerendt feur von seinem  
mundt/das es dauon blizet. Summa/ye mehr wir  
fortfaren/ye mer er mit seiner straff auch will fort fa-  
ren/

ren. Dann so sagt er zun Kindern von Israel/ Wer-  
det jr mir nicht gehorchen/ vñ werdet meine sagung  
verachten/ so will ich euch heym suchen/ mit schrecken/ <sup>Leuit. 26</sup>  
schwulst vnd fieber zc. Ir solt vmb sonst ewre samen  
seen/ vnd ewere feind sollen ihn fressen/ vñ ich will  
mein antlitz wider euch stellen / vñ solt geschlagen  
werden vor ewern feinden/ vnd die euch hassen/ sol-  
len vber euch herrschen/ vñ solt ja fliehen/ da euch  
niemand jagt. So jr aber vber das mir noch nit ge-  
horchet/ so will ichs noch siben mal mer machen / Vñ  
wo jhr mir entgegen wandelt/ vnd mich nicht hören  
wölt/ so will ichs noch siben mal mer machen. Wer-  
det jr euch aber damit noch nicht von mir züchtigen  
lassen/ so will ich euch noch siben mal mer schlagen/ vñ  
will ein rachscherdt vber euch bringen. Vñ ob  
jr euch in ewre Stet versamlet/ will ich die Pestilenz/  
vnter euch senden/ vnd will euch in ewer feinde hen-  
de geben. Ich will euch vnter die Heyden streuen/  
vnd das schwert außziehen/ hinter euch her/ das ewr  
Land soll wüst sein/ vnd ewer Stet verstorret.

Hie last vns wol betrachten/ was wir an vnserm  
vnbusfertigen leben erlangen / nemlich / ein straff  
vber die andern/ Denn Gott lest sich nicht trozen/ ye  
herter vñ verstockter/ wie gesagt/ wir werden/ ye  
herter vñ erschrocklicher er mit der straff auch sein  
will/ wie er hie sagt/ Er wöll jmerdar siben mal mer  
hynzu thun. Vnd wie man pflegt zusagen/ das auch  
war

war ist; Nulla calamitas sola, Es kompt kein vnglück  
allein. Also will Gott mit vns/so wir inn sünden be-  
harren/auch thun/Er will vns nicht allein ein straf-  
fe/sonder vil vnd mancherley zuschick'en/Vnd wo  
schon eine auff höret / da sollen sibem andere an die  
stat kommen.

Deut. 28.

Werden wir aber dem Herren gehorchen/sein  
wort vnd Euangelium gern hören/lieben / glauben/  
vnd ime mit werck'en nachkommen/so wirdt er vns  
gnedig sein in allen vnsern werck'en. Als wie er sagt/  
Ich will dich segen in deiner Stat/auff deinem acker/  
Du wirst gesegnet sein in allen deinen werck'en. Vnd  
summa/was wir werden thun/ wirt alles lauter se-  
gen vnd gnad Gottes sein.

Das aber Gott yetzt Deutsch land zu straffen  
fürgenommen hat/ist neben andern dis die vrsach/  
Das es vor andern Nationem mit dem heyligen E-  
uangelio reychlich vnd schön begabet vnd begnadet  
gewesen/vnd noch ist/hat aber desselben gar wenig  
geacht/ ja hat desselben seine sünd vñ grewel zubes-  
tigen hoch gemisbraucht / Darumb dann der Herr  
(so wir inn sünden beharren werden ) mit der straff  
in keinen weg außbleyben kan. Es ist auch zubesor-  
gen/es werd vber vns gehen das grausam vnd er-  
schröcklich vrteyl / welches Christus Corazin vnd  
Bethsaida/auch Capernaum trewet/deren aller ver-  
damnus (wie er sagt) schwerer sein wirt / dann Ty-  
ro

Mat. 11

ro vnd Sidon/Sodoma vnd Gomorra. Dañ we-  
ren dise thaten geschehen/bey andern Nationen/wie  
bey vns/sie würden sich des Euangelij sunderzweif-  
fels/besser dann wir gebraucht haben. Aber so sol es  
gehen/also ist's auch gangen/das der gesund nit weiß  
noch verstehet/wie ein grosser edler schatz es sey vmb  
die gesundheit/bis er krank vñ ein bethris wirt/Dañ  
so pflegts zugehen / wenn man ein ding hat/so acht  
man sein nichts / bis mans verleuret/ so denckt man  
dannerst/was man gehabt hab. Dergleichen ist es  
mit vns auch/wir haben das lieb wort Gottes (wie  
gesagt) nun vil jar her/reichlich on allen kosten vñnd  
schaden gehabt (dañ es hat niemand das sein genom-  
men/sonder yederman geben vnd gelassen was ihm  
Got gegönnet/vñ darzu die seligkeit angeboten) aber  
niemand hat desselben geachtet/Das wol der Heilig  
Jahannes sagen mag/Das liecht schin in der finster-  
nus/aber die finsternus habens nit begriffen/ Item Jonha. 1  
es kam inn sein eygenthumb / aber die seinen namens  
nicht auff. Vnd wie der Herr sagt/Es werde gehen  
wie zur zeit Noe/man werd essen/trincken/kauffen/  
verkauffen/heyraten/frölich sein etc. vñnd werdt das  
wort/wort/Predig/Predig/Euangelium/ Euange-  
lium sein lassen. Das solchs izt war sey/ darff keines  
prohibens/es leit je am tag offentlich/Dañ zu welcher  
zeit hat man so grossen pracht/uberflus vñ Anzucht/  
in essen vñ trincken geübet/als zu diser gnadenreichen  
E zeit/

zeit/da wir billich solten inn aller demut / zucht vnd  
messigkeit/als nüchtern wachende Christen gewan-  
delt haben? Wenn hat man so grosse hoffart vnd  
vbermut mancherley selzamer kleider gebraucht/als  
zu diser vnser zeit? da wir billich als die kinder Got-  
tes/in demut vnd vnderthenigkeit/vnd nicht als die  
welt vnd Teuffels kinder inn hoffart/ vor dem Her-  
ren solten gelebet haben? Wir sehen nur wie es gehet/  
es gilt kein sauber/erbar kleidung mehr/als etwan bey  
den alten/sonder ye vnflätiger/vnehrlicher/zerrissener  
vnd nerrischer mans machen vnd tragen kan/ye lie-  
bers der welt ist. Zu dem so bleibt niemand mehr bey  
dem/ das seinem stand wol anstehet/sonder ein yeg-  
licher wil dem grössern gleich gehen. Der Baur lest  
sich seines zwilchs vnd grawen rock's nicht mehr ge-  
nügen/wil einen burger anziehen. Der burger lest sich  
auch seins nicht mehr benügen/wil gleich Edel wer-  
den/als wie wir sehen/das jzt schlechte leut köstlicher  
vnd herrlicher geschmückt gehen/dann vorzeiten der  
Adel/ Vnd summa/ keiner wil nach dem andern/son-  
der ein yeglicher wil vor dem andern sein. Also auch  
mit kauffen vnd verkauffen/Wenn ist der handel so  
groß vñ vberflüssig in allen dingen gewesen/als jzt?  
es ist schon dahin gerathen/das niemands mehr bey  
seinem Ampt/beruff vnd stand/darein ihn Gott ge-  
setzt/bleiben wil/das er seines segens warte/vnd sich  
dauon ernehre/sonder ein yeglicher wil on arbeit mit  
handlen

handlen ( wie sie es nennen ) reich werden / Da hilfft  
kein predigen / kein leren / kein warnung / kein verma-  
nung / kein straffen / ja kein bitt vnd flehen mehr / es ist  
doch alles vmb den pfenning ( wie man sagt ) zuthun /  
vmb des willen / leugt vnd treugt man / versetzt vnd  
verpfendt man die seel / vergift aller ehr vnd trew / ja  
das mehr ist / man verlaugnet Gott des Herren im  
himmel drum. Es will nicht mehr helfen ein zim-  
licher gewin / oder da ein pfenning ( wie es etlich für  
genug achten ) den andern tregt / es muß alles triplirt  
sein / da ein pfenning drey oder vier andere erschabet /  
Es wil auch nicht mehr sein bey dem gemeinen Man  
sonder der Adel / so etwa von sein gefellen lebt / vnd  
seinem stand nach für vnehlich gehalten / kauffman-  
schafft treiben / will jzt auch kauffherr vnd handler  
werden / vnd das noch grösser ist / Die oberkeiten  
zum theil / so sich ihrer zins vnd tribut solten genü-  
gen lassen / vnd das / so vnrecht vnd vnzimlich straf-  
fen / treyben grösser finantz dann der vnterthan. O  
schand vber alle schand / die das vnzimlich solten we-  
ren / thun dasselbig selbst. Darumb muß Gottes  
zorn vom himel anbrennen vber alle die / so böses thun.  
Ich will hie von kauffen vnd verkauffen / so ehlich  
ist / on welches die welt nicht bestehen kan / nichts ge-  
redt haben / sonder allein von dem / das vnzimlich / vñ  
vil zuvil oder gar zu vberflüssig ist / als wie alle ding  
vnrecht vnd stresslich seind / so vber das mas gehen /  
C ij wollen

wollen wir nun recht essen vnd trincken/kauffen vn  
verkauffen/ja alles thun das man erdencken mag/so  
müssen wirs also thun/das Gottes nam dadurch ge-  
ehret/vnnd dem nechsten ein gut Exempel gegeben  
werd. Dann so es anderst geschicht/so ist es vnrecht/  
ob es schon sunst an ihm gut ist. Darumb sollen wir  
Gottes namen in all vnsern wercken/die richtschnur  
oder winckelmaß sein lassen/ Dann es muß alles da-  
hin lenden/ Geheyliget werd dein name.

Des haben wir nun in diser gnadenreichen zeit/  
des lieben Euangelij wenig geachtet / sonder haben  
nach vnserm willen vnd wolgefallen in der finster-  
nuß vnserer sünden/also hingewandelt/gleichsam als  
wenn wirs wort nie erkant oder gehört hetten/Vnd  
haben also nicht betrachtet / was für ein edlen vnnd  
köstlichen schatz wir am Euangelio/ dadurch vns die  
seligkeit nicht vmb golt oder silber/sonder auß gnad/  
barmherzigkeit/angeboten wird/ gehabt haben.

Wirdt aber der Herr sich von vns feren ( das  
ferre sey) vnd das wort wider von vns hynweg ne-  
men/als wie vor mer geschehen/vnd sich yetzt erzey-  
gen thut / als denn werden wir sehen / was grossen  
schatz wir gehabt haben / vnnd ob wir schon wolten  
zum Herrn schreyen/so wirt er doch nit hören / Den  
Esai. 50. vnnd 65. es heyst / Da ich kam/ war niemant da/ vnnd da ich  
rieff/



rieff/antwort mir niemandt/vnnd thetten was mir  
übel gefiel/ vnd erweleten das mir nicht gefiel. Dar-  
umb will ich euch nicht erhören/wenn jr schon vil bet-  
tet/Vnnd ob ihr schon ewer hend außbreytet/will ich  
doch mein angesicht von euch wenden. **Derhalben** Esai. 1.  
sollen wir den Herrn suchen/dieweyl er zufinden ist/  
vnd in anruffen dieweyl er nahe ist/so wirdt er vns  
gnedig sein/denn bey jm ist vil vergebung. Esai. 55.

Vor allen dingen aber sollen wir hynlegen/wie  
gesagt/das grausam vnd erschröcklich schweren/vnd  
Gottflestern/vnnd fleyssigbedencken / das der Herr  
keinen werd vnschuldig hynlassen / der seinen namen  
vergeblich füret. Wie gemein ist aber solchs laster bey  
der ganzen welt/bey jung vnd alt / Mannen vnnd  
Frawen höret man täglich wol/ Es ist schon dahyn  
geratten/das man vmb nichtiger vrsach willen/ja in  
ein guten scherz bey den heyligen Sacramenten/bey  
den heyligen wunden Christi vnser erslösers / vilfal-  
tig schweret. Was geschicht dann / da es etwas an-  
trifft/vnd ernst ist ? Hierinn solt nun ein Christliche  
Oberkeyt ein fleyssig auffmercken haben / damit sol-  
che Gottflestere on gnad vnd barmhertzigkeyt/vi-  
len zum Exempel vn̄scheube gestrafft würden/Den̄  
strafft man den/der etwa einem sein ehr abschneydet  
Oder der Oberkeyt vngheorsam ist / wie vil mer soll  
man den straffen/der Gott dem Herrn seinen höch-  
sten schatz/sein heyligen namen verunehret. Aber die

C iij Oberkeyt

Oberkeit ist hierinn gantz taub vnd blind / sie meinet /  
wenn sie der straff / so eusserlich sich oder andere be-  
klaget / so hab sie jr Ampt ein genügen gethan / Got  
geb es stehe vmb vnsern Herrn Gott / wie es wölle.  
So doch die Oberkeit von Gott dem Allmechtigen  
vor allen dingen eingesetzt / vnd verordnet ist / das sie  
den namen Gottes soll helfen heylig / vnd ehlich hal-  
ten. Darumb sol sie wissen / das der Herr mit schwe-  
rem wucher an ihenem tag das pfund / so er ihr ver-  
trawet / wider von jr nemen / vnd fodern wirt / Got  
geb das sie es fleysig bedenc̄ / vnd auch wol zu her-  
zen fasse / das nit allein geschriben stehet / Gebet dem  
Keyser / was des Keisers ist / sonder auch dabey / Ge-  
bet Gott / was Gottes ist.

Es soll vns auch dise not / so yetzt vorhanden /  
nit ein gering vnd verechtlich ding sein / als etlich vie-  
hisch leut / die weder Gottes noch der Welt achten /  
vermeinen / Sonder soll vns ein anligende vnd tru-  
ckente schwere not sein / seytemal es nicht vmb etlich  
land vnd leut allein (welchs doch nur genug / da mer  
dann zuvil were) zuthun ist / Sonder vmb gantz  
Deutsch Nation / vmb vnser weyb vnd kinder / leyb  
vnd leben / ehr vnd gut / ja das mer ist / denn solches al-  
les / vmb das lieb wort Gottes / das heylig Euange-  
lion / Dann der feind begeret fürnemlich auffrottung  
Götlichs namens / vnd dargegen auffrichtung vnd  
bestetti-

bestettigung seiner falschen vnnnd teuflischen Ab-  
göttereyen vnd vnzucht. Derhalben ist hoch von  
nöten/das wir dise not wol erkennen/ vnnnd sie dem  
Herrn mit ein busfertigen leben/ sampt einem glau-  
bigen hertzen täglich fürtragen. Dañ so das solt fort  
gehen/das der feind beschlossen vnd für hat/hilf Got  
was jammer solt werden in Deutscher Nation?

Demnach sollen wir vnser zungen zwingen/  
das sie nicht vergeblich von disen gefährlichen dingen  
wesche. Dann Gott last sein nicht spotten / Er lest  
wol vergeblich reden / aber er fehret mit der straffe  
immerdar ye neher herzu / vnnnd fort / das / wenn  
wir meinen er hats vergessen / so kompt er dann /  
vnnnd erinnert vns mit der straffe der sünden.  
Wie vil grober menschen sind / so gesprochen haben /  
sie wolten/ das sie dieweil genug hetten/bis der Tür-  
cke keme/vnd sind on zweyffel auch deren vil im Un-  
gerlandt gewesen/ so nicht vermeinet hetten/das ge-  
schehen solt / so schon geschehen ist / Gott hat sie im-  
merhyn sicher sein lassen/vnnnd nichts desterweniger  
dem Türcken fort zufaren verhenget/das er yetzt ein  
guten teyl des Ungerlandts (das niemandt sich ver-  
sehen het) innen hat. Also auch hat er vns gethon/  
hat vns immerdar inn guten friden vnd rwe sitzen  
lassen/das wir gemeinet/es könne vns nichts wider-  
faren/ Hat aber nichts dester weniger mit seiner straf-  
fe

se fürgetrückt / also / das wie ihene den rechten Tür-  
cken den Erbfeind der Christen haben / Also haben  
auch wir dargegen den Papst / des teuffels Anwalt /  
mit seinem hellischen hauffen / welcher / ob er schon  
noch vns nicht innen / vnd im gewalt hat / doch vor  
der thür ist. Ihener nimpt tribut / vnd leß die leut  
bey leben / Diser hat beschlossen / vnd begeret nicht al-  
lein alles / sonder auch / gut / ehz / leyb vnd leben / ja den  
Christum selbs zuuertilgen. Darumb wenn wir  
meinen / vnser vnglück sey noch zu Jerusalem / so ist  
es schon vor der thür / Gott wölle / das wirs hertz-  
lichen erkennen / vnd nicht thun / als wie wir leyder  
bis her gethan haben / da wir vns ab keiner straff vñ  
heymfuchung haben wöllen bessern.

Wie offft hat vns Gott heymgesucht / mit thew-  
rung / mit Pestilenz / mit erschrocklichem vnd graus-  
samen hagel / vnd vngewitter / Da er offft alle frucht  
des feldes in grund vnd boden verderbet hat ? Mit  
was selzamen vnerhörten krankheyten hat er die  
welt beladen / vñ noch heut bey tag ? Aber niemand  
hat sich wöllen dorab stossen / vnd bessern. Dieweyl  
nun solches alles vns nit hat mögen bewegen / vber  
das / das er vns so väterlich vnd treulich hat gerey-  
get / gelocket / vnd von sünden abgefördert / so hat er  
ime ein andere straff fürgenommen / nemlich / die vn-  
busfertigen inn irem blüt zu baden / vnd zuerseuffen /  
Als

Als wie er denen zu Jerusalem auch gethan hat / als  
der Psalm klaget / das man blüt vergossen hab vmb Psalm. 79  
Jerusalem her / wie wasser / vnnnd niemands sey ge=  
west / der die todten cörper begraben hab / Will aber  
das auch nit helffen / so wirdt er vns auch / wie er den  
Juden gethon hat / seines worts berauben / das wir  
also nicht ein plag vnnnd vnglück allein / sonder sibenz  
für eine haben / vnnnd dennoch des worts mangeln  
werden.

Derhalben last vns die vrsach / darumb Deutsch  
land in gefahr stehet / wol bedenden / vnd last vns zu  
Gott vnserm Vater bekeren / vnd sprechen / Wir ha=Sant. 9.  
ben gesündiget / vnrecht gethan / sind gottlos gewe=  
sen / vnd abtrünnig worden / Wir sind von deinen ge Psalm. 106.  
botten vnd rechten gewichen / aber du bist barmher=  
zig / darumb sey vns gnedig / vñ straffe vns du selbs / Judith 7.  
Vnnnd dieweyl wir dich erkennen / vbergib vns nicht  
den Heyden / die dich nicht kennen / das sie nicht rhu=  
men / Wo ist nun jr Gott ?

Gott aber aller gnaden vnnnd barmherzigkeyt /  
verleyhe vns die zeyt vnserer heymfuchung / durch  
seinen lieben Sun / Jesum Christum / vnsern Herrn /  
vnd einigen mitler / seliglichen zuerkennen / vnnnd die  
tag des heyls nicht zuerseumen / das wir vnser wal=  
D fart


es. m. 13  
fart vnd heyl an denselbigen schaffen / ehe vns der  
feind / vnd die erschrocklich nacht / in deren niemandt  
mer arbeyten kan / vrblozlichen vberfallen.


A M L N.

Matthei am 13.  
Wer ohren hat zu horen / der hore.

Osee am 13.  
O Israel / du hast dich selbst verderbet /  
vnd vmbgebracht.

Gedruckt zu Nürnberg durch Johann vom  
Berg / vnd Ulrich Neuber / wonhafte  
auff dem Neuenbaw.







AB 154084

№ 987

ULB Halle 3  
002 724 286  


17





Wes  
fehrlich  
dem  
enc

W

e

en ge  
wie man  
Welt  
soll/  
Bes  
am

men  
s

7-6

